



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 8 Yangia anidakangma : f Tir Yimym tiryimym@aolima tir yimym TAPAK 7

IPL 2024: Rishabh Pant dang senchi sen lakh 24 achi

Benny Gantz-i Israel nung election agitsü ajungshir

VOL. XXI ISSUE NO. 172 (ADOK 172) DIMAPUR ROGONÜ (FRIDAY) RONGCHII (APRIL) 05, 2024 ₹ 5.00

Cabinet-i ENGOA dang ENPO mesüzüksü ajungshir

Kohima, Rongchii/April 04 (TYO): Tanü Nagaland Cabinet-i Eastern Nagaland Gazetted Officers Association (ENGOA) dang aruya aliba Lok Sabha election nung par nüburtem shilem agitsü mesüzüksü ajungshia liasü.

Chief Minister's Residential Office Kohima nung state cabinet aser ENGOA ketdangsurtem ghonda asem dak tema senden amenba mapang iba tayongzükba ya agüja liasü.

"Tanü Cabinet-i ENGOA aser Eastern region nungi lenir kar den senden mezüngbuba mena liasü. Onoki documents ajak nung ajemdaker shisa lemsatep aser ENPO ajanga danga yimten yimsüsür tem den parnoki aginüba indang koba tashi terenlok ali, item ajak asadanga liasü," ta Nagaland Government Spokesperson & Minister K G Kenye-i osangbener dang ashi.

"Onok jangratema, temulung ajak rakpoka jembishinüa liasü aser state sorkaria 2010 nungi tanü tashinung mera balala agiba indang lemsatep aser züngsem temia pei bilemba lemsatepa liasü," ta pai ashi.

Cabinet-i ENGOA ajanga ENPO nung tang election nung shilem agitsü aser tarutsü nunga metoktepi amalitep akatsü osang nenshia shiokogo, ta pai ashi.

"Tangatetba nung aser tali tarezüktepe nung asenoki iba ken o bentettsü. Parliamentary election matongdang mebentetra iba ken o samatsü ta ashir masü.

Ibai maparen ya tanen makai inyaksüla aser küm ter dak tema jembia arur aser Centre nung sorkar tasen amenokba sülena maneni jembitsü," ta Minister Kenye-i ashi.

ENPO-i maneni par telemtetba nung nokdakra, onoki maneni nisung ajak dang iba linük indang election maparen nung shilem agia parnok vote agütsütsü ajungshitsü.

2023 State General Election agitsü lia iba ken o bentettsü sangdongba ama Centre nung sorkar tasen kumteter-a kecha mesütetra kudasütsü ta asüngdang dang, ibaji Central sorkar dak keta lir, kechiaser iba jembishinü nung state sorkar maden saka ken o jembishinü tenzükba sülen adentsü, ta Kenye-i langzü.

Linük indang senso tajung ka ama election inyakyim nung shilem agitsü asoshi ENGOA-i maneni ENPO mesüzüksü merangtsü ta shioko, ta pai ashi.

Parnok nem nungloktsüba mapa parnoki temulung agüja aser nendaka inyaksü bilemer, ta pai ashi.

Election tonga arur aser candidate asem lir aser kecha agia iba inyakyim nung tetsükdaktsü magütsüsüla, ta pai ashi.

"Election maparen junga tembangtsü imlar aser ozü candidate atema teimla lir. Nübur ajunga dang ozü candidate Dr Chumben Murry yaritsü ayongzükter, shiba PDA candidate lir," ta Kenye-isa ashi.

Tir Murmu-i cancer atema gene therapy NexCAR19 semzüksü

New Delhi, Rongchii/April 04 (Agencies): Brehostibarnü IIT Bombay nung Tir Droupadi Murmu-i cancer CAR-T cell therapy asoshi India nung mezüngbuba home-grown gene therapy, 'NexCAR19' sayatsü.

Ibai India nung healthcare innovation nung alizüng tasen ka lir aser iba jenjang talang treatment yagi meimchir ajunga asoshi teimla tasen agütsütsü, ta lai ashi.

Iba therapy yagi shiranger zünger mezüngmai aliba nem takum tasen agütsütsü, ta lai temulung lema ashi.

NexCAR19 ya relapsed-refractory B-cell lymphoma aser leukaemia treatment nung amshir. Iba nungya "leukapheresis" nüngja agüja aliba inyakyim agi shiranger indang azü bendener aser manufacturing center dangi yoker.

NexCAR19 agitsü lia temang renemshitsü atema asemnü chemotherapy agütsütsü. NexCAR19 renemba sülen shiranger nem catheter placed

ajanga tezü (intravenous infusion) nung agütsütsü. Iba mozü agütsüba sülen shiranger temang anogo 7 nungi 14 tashi repranga alitsü. Iba mozü nung side effects lir.

CAR-T cell therapy ya medical science nung tajungtiba ta züngshir, ta Tir Murmu-i ashi.

Developed nations tem nungbo mapang tatsüka amshia arur, saka sen tasak asüba ajanga alima nung shiranger aikati magiteti aru, ta lai ashi.

Tanü sayaba therapy ya alima nung jenjang tajemtiba CAR-T cell therapy lir aser ibai 'Make in India' sentong nung tatishitsü ka lir, ta lai pelaba lemsatep.

"India nung iba therapy yanglua October 2023 nung amshitsü agizükba ajanga Indian scientists aser physicians tem dak sempet aliba sayur," ta India tiri ashi.

India indang mezüngbuba CAR-T cell therapy ya Indian Institute of Technology, Bombay aser Tata Memorial Hospital lungjemer industry partner ImmunoACT den külemi yanglu.

Alima rara tanabuba rarar küm 80 ajungba anogomung amung



Alima rara tanabuba rarar küm 80 ajungba nungtem nung Allied Forces nung jakzükter temi April 4, 2024 nü Kohima War Cemetery semdanga narojong inoktsüba sülen tangokba noksa nung angur.

Kohima, Rongchii/April 04 (TYO): World War-II rarar küm 80 ajungba bilemteta United Kingdom nungi Allied Forces nungi jakzükter züngsem 26-i Brehostibarnü Kohima War Cemetery nung akum agüja narojong inokja liasü.

WW-II mapang Battle of Kohima nung rarar aser asürtem nem akum agütsüba telok ya Kohima Education Trust indang trustee Charlotte Carty-i anir liasü.

Iba sentong nung jembidang, Japan nung sepai den takok ngua raraba nung British army

den tembar asüba atema Naga nung aser Indian sepaitem dang pelaba Viscount Mark William Rawdon Slim-i metetdaktsü.

Küm 80 jakdang iba lima nung allied forces temi takok anguba atema pelatsüla aser tejak tentettsüla, ta pai iba sentong nung ashi.

Parnok nem teti tenüngsang agütsütsü langa lir, ta ashi.

KET Trustee, Charlotte Carty-i osangbener den jembidang, Naga nungeri allies tem yarıba ya khenyongi balaka liasü, ta ashi.

Rara mapang aliba sepaitem dak nungi jakzükter ka ama kütsü Battle of Kohima indang shisatsü künem agütsü aser lai tangbo iba otsü ya tarutsü putu nem angazükdaktsünier, aser yamaji inyakra anüdoklen tongpang nung tasü ita raraba maneni bilemtettsü, ta lai ashi.

Iba rara ya tesashitiba rongnung ka liasü aser danga rara dak nungi alakteta liasü, anungji tesüba mapang atalokbatem nungi shisatsü angur aser tarutsü nung kasa meinyaktsü imlar, ta Carty-i ashi.

ECI-i party/candidate dak sendakba advertisement kumdanga adoktsü metetdaktsü

Kohima, Rongchii/April 04 (TYO): Election Commission of India (ECI) ajanga print media houses, political parties, candidates mesüra danga lokti tentet tem dang State mesüra District level nung MCMC Committee ajanga jelia temelaba magütsü tashi election anogo mesüra election agitsü anogo ka lia political party mesüra candidate dak sendakba advertisements kecha madoktsü totuyuba agütsüo.

Tesüba mapang print media nung dangar temulung yirutsütsüsa mesüra mashileni anitsüsa osang adokba Commission dangi osang arua lir, ta ECI ajanga ashi.

Iba yongji April 19 nü election agitsü aliba Nagaland state nung 'restricted days' ya April 18 & 19 alitsü.

Applicants temi advertisement adoktsü anogo ana bosa jelia lia MCMC dang temelaba asüngdangtsüla, ta ECI ajanga

metetdaktsü. Osangkaket nung advertisements adoktsü asoshi pre-certification agütsütsü atema State/district level nung MCMC tekeratiba nung tenteta political parties, candidates aser dangar temi iba ama advertisements agütsüba asadanga jelia temelaba agütsütsüla, ta Commission ajanga totuyuba agütsü.

MCMC ajanga item telemtetba ya tekeraba aser tajungtiba nung agitsüla, ta ECI ajangasa ashi.

Aibelener nem tapet temerenshi agüjang: DUCCF, DDGBA & GBUDS

Dimapur, Rongchii/April 04 (TYO): Northeast nung temesepba mozü shibelener tetsüti apuba atema Commissioner of Police, Dimapur, Kevithuto Sophie aser DGP Nagaland, Rupin Sharma nem tenüngsang agütsürm ta Dimapur Urban Council Chairmen Federation (DUCCF) tir Zasivikho Zakiesato, Dimapur District GB Association tir Hokuto Zhimomi aser GB Union Dimapur Sadar tir Kholie Kapfo nungeri sangdong ka ajanga ashi.

Muslim Jame Masjid Committee, Newmarket Dimapur indang tamangba yimsü lenir iba ama ozüng alema temesepba mozü shibelenba aser kingpin/mafia mapa inyakba ya lendong tulu lir aser kanga junga shisadangtsü nüngdaker. Iba ama lendong aketba committee ya kechi südir süaka asen lokti nungi raksa indoktsüla, ta DUCCF, DDGBA & GBUDS ajanga ashi.

Bushistüngdang temi iba ken o aser inyakyim kanga junga bushistüngdangtsü akhanger. Drug mafia indang tetsüti Bahar Uddin ya ozüng agi mela aliba ama merenshitsüla aser tatok magütsütsüla. Alima sunepa alitsü mechi iba ama mapa tamajung inyaker ya takum tepiyong tepuokdak ayutsüla, ta sangdong ajanga ashi.

Nüburtem temesepba mozü

aser yi nungi kumzükba ayutsü aser samatsütsü atema bendanga agütsür inyakba atema CP Dimapur aser DGP Nagaland nem tenüngsang agütsür aser maneni inyaksü ajungshir, ta DUCCF, DDGBA & GBUDS ajanga ashi.

Maneni ozüng amshirtem dang item temesepba mozü aruba tera tali kaktettsü ayongzükter, kechiaser linük tesem balalai temesepba mozü shibelentsü atema Dimapur ya 'transit point' ka kumogo.

Ano Dimapur nung aliba Muslim nungertem danga iba ken o süoki ia agizükba nüngdakba mera agitsü ajungshir. Temesepba mozü aser yi samatsütsü asoshi mera agiba nung department den yariteptsü teti renema lir, ta DUCCF, DDGBA & GBUDS sangdong ajangasa ashi.

Kohima nung MSMEs aser tetsür entrepreneur tem atema workshop ka ayongzüka katsü



Kohima, Rongchii/April 4 (TYO): U.S. Consulate General Kolkata aser CUTS International nati Centre for Development of Advanced Computing (C-DAC) aser YouthNet Incubation Centre (YIC) den longjemer Brehostibarnü Kohima nung Micro, Small and Medium Enterprises (MSMEs) aser tetsür Entrepreneurs tem atema workshop ka ayongzüka katsüogo.

Workshop nung cybersecurity threats tem koda jangjatsü aser raratsü iba indang tangazükba

agüja liasü. Iba workshop nung enterprises 50 dak tema nungi nüburttem shilem agi kong tetsür entrepreneurs tem timba liasü. U.S. Consulate General Kolkata-i, shishilemba tiliateritem aser tetsür entrepreneur temi achayangba shishilemba balala cyber-crimes agi amokmerenba nungi jenboa toktsütsü atema East aser Northeast India nung iba inyakym nongita arudar.

American Center Deputy Director aser US Consulate General Kolkata Assistant

Public Affairs Officer, Juan Clari ashiba agi, "aso 21buba nung cybersecurity ya linük, company tem aser nüburttemi ajangshiba tetsüdahtsü tulutiba rongnung ka lir. Wadang ajak nungi entrepreneur temi iba ya jangjatsü aser jenboa alitsü angazüktsü kanga tongtibang.

Paisa, "US aser India na lenla balala nung kanga tajungba sendaktepa arudar aser cybersecurity ya-a ka lir," ta ashi. Maneni pai sentong nung shilem agirtem nem tenüngsang agütsü aser workshop ayongzüka atema CUTS nem tenüngsang

agüja liasü.

Kasa mapang nung Software Technology Park of India (STPI), Government of India Additional Director Abhishek Mishra-i, "SMEs atema tangbo cyber security ya kangabo tongtibang masü aser iba ajanga SME sector inyakym raksatsütsü akok. Tanü mesüra asüngbo SMEs temi cyber threats tem ajangshitsü. Iba amala amokmerentem nokdangtsü atema tongtibangsa inyaktsü tang mapang lir. Linük ajanga nung SME networks yanglutsü aser alima ajanga nung SMEs tem ajangkettsü atema maangka agütsütsü asoshi STPI-i inyakdar. CUTS International aser YouthNet nati cyber security dak sendakba nung SMEs tem nem tangazükba agütsütsü asoshi mapang shitak nung jenjang agiba ajanga SMEs tem tashioktsüba balala nungi jenboa alitsü atema teyari agütsütsü," ta ashi.

Sentong nungsa CUTS International Senior Program

Officer, Sumanta Biswas-i, COVID-19 wara poktetba ajanga digital technology amshiba tali kumogo aser MSMEs tem aika cyber-attacks den raratsü asoshi junga mangateti online ajanga shishilemba tenzüko aser iba ajanga parnok lendongbang nung toktsür, ta ashi

Paisa, "iba workshop ajanga entrepreneurs tem nem cyber-attacks asüba lenmang tem indang angazüktsü aser amokmerentem den raratsü atema inyakymtem angazüktsü asoshi teyari agütsütsü," ta ashi. Pai ashiba agi, training agütsüba ajanga entrepreneur temi cyber-attacks shilem 70 denbo raratetsü.

Workshop nung shisalen sayurtemji Saket Kumar Jha, Scientist - D, C-DAC Patna, aser Sonal Kamal, Knowledge Associate & OSD (R&D), C-DAC Patna na liasü. Tenaprongla C-DAC Patna Cyber Security and Forensics Team nung inyaker.

Facilitation Centre April 8 nü nungi inyaksangshitsü

Dimapur, Rongchii/April 4 (TYO): Deputy Commissioner (DC) aser District Election Officer (DEO) Mokokchung, Thsuvisie Phoiji-i sangdong ka ajanga, polling personnel ajak dang 'Facilitation Centre April 8 nü nungi tenzüka anepdang 10:30 ako nungi nikongtsütsü

4:00 ako tashi lapoktsü ta metetdaksüogo.

'Facilitation Centre ya, hand-on training mesüra ken o mejangjai aliba jangjashitsü nüngdakba ketdangsürtem aser Evaluation Test majangtetba polling ketdangsür ajak atema Deputy Commissioner,

Mokokchung 1st Floor Conference Room nung lapoktsü.

Polling ketdangsür ajak dang, election agiba anogo pei tata mapa nung aibelen kecha malitsü atema iba facility ya amshitsü asoshi metetdaksüogo.

Kohima nung polling personnel tem training 2buba shilem April 5 nü agitsü

Kohima, Rongchii/April 4 (TYO): Deputy Commissioner & District Election Officer, Kohima, Kumar Ramnikant-i sagdong ka ajanga taruba 18buba Lok Sabha election atema polling personnel ama shimba aliba ketdangsür aser staff tem dang training tanabuba shilem April 5 nü 10 ako nungi tenzüka Kohima College, Billy Graham Road, Kohima nung agitsü ta metetdaksüogo.

tem atema asütsü.

11 Northern Angami -IIAC, 14 Southern Angami - I AC aser 15 Southern Angami -II AC atema Presiding Officers, 1st Polling Officers, 2nd Polling Officers aser 3rd Polling Officers tem atema training April 6 nü 10: 00 ako nungi tenzüka College, Billy Graham Road, Kohima nung agitsü.

Kasa sangdong ajangsa, ken o dak sendaka aliba polling ketdangsürtem dang training agitsüba anogo ya temulungdang ayutsü aser temerenshi nungi jenbotsü atema tamakok maludaktsü arua shilem agitsü tetuyuba agütsüogo.

Training ya 8 Western Angami AC, 9 Kohima Town AC aser 10 Northern Angami - I AC atema shima aliba Presiding Officers, 1st Polling Officers, 2nd Polling Officers aser 3rd Polling Officers

Fazl Ali College o Sherubtse College, Bhutan na sobaliba angazüktepba sentong akar



Sherubtse College, Royal University of Bhutan nungi arur kaketshirtemi par sobaliba yimya nung shilem agidang tangokba noksa nung angur. Mokokchung, 4th April, 2024

Mokokchung, 4th April (TYO): April 3 nungi tenzüka Fazl Ali College, Mokokchung nung riju ansanger sobaliba angazüktepba sentong tajung ka agidar. Ibai riju ana - Sherubtse College, Royal University of Bhutan o Fazl Ali College, Mokokchung na külemi senteper tesentaktep akangshitsü nükjidong yur ayongba sentong ka lir.

Tanü sobaliba sentong ka "celebrating diversity, uniting cultures: A kaleidoscope of experiences" omen dak rangloker agia liasü. Iba sentong nung FAC principal Dr. I. Wati Imchen-i tarur pela-a agizükba den FAC nung azüngertemi Naga nung yimya nung jilushi, sobaliba kentenmenü, yar tsüngsang, kongki atemba, tsüksen ken, tetsür tebur sobusolemtsütem yimya balala nung ia sayu, yamaji Sherubtse

College nungi arurtemia par sobaliba kentenmenü, tsüngsangba aser sobusolemtsütem yimya balala ajanga sayua liasü. Jubilee Memorial College, Mokokchung nung azüngertemia Aor sobaliba yimya nung yar tsüngsang ka ia sayu.

India linük amaji Bhutan ya-a nüburttemyoktep adenshia lungjema aliba lima (unity in diversity) ka lir, iba ya tenüng agi benokba maparen (concept) ka masü saka ozü limabo ibai shitak benshir. Mokokchung (Nagaland, India)-i arur anogo ananü jangratema aser tangazükba jenti ngua mungdaki, ano asüng tashi amungtsüba lir aser ano shisatsü aika angazüktsü imlaa atar, ta Sherubtse College nungi arur kaketshir ka tenüng agi Prem Mani Mongar den iba osangbeneri jembidang

lemsatep.

Bhutan ama bendang lima nungi arua 'cultural exchange' sentong akaba yabo ibai mezüngbuba asütsü aser ibai FAC otsü nung tapak tasen ka asütsü. Kisüng dang aliba yagibo asenok tokolok shisatsü merenloktsü, anungji, iba amala sentong ya mapang shia akatsüla aser iba ajanga asenok kati ka metetepba dang masü saka kechisarena angazükteper aser shisatsü ululoker. Taküm October ita nungji FAC pura Bhutan-i aotsü tang tejembidak lir, ta FAC nung tesayur P. Tiatemsü-i iba osangbener den jembidang metetdaksü.

Sherubtse College nungi tesayur 2 den kaketshir parnok 30 arua lir. Tanü parnoki Mopungchuket, Impur lima semdanga liasü aser asüng April 5 nü Ungma yim aser ano tanga tesem kar semdangtsü sentong lir.

H&FW-i MR Scheme melenshiba metetdaksü

Dimapur, Rongchii/April 4 (TYO): 2022 küm November 1 nü nungi tenzüka Chief Minister Health Insurance Scheme (CMHIS) benokba sülen Medical Reimbursement (MR) Scheme melenshiba indang Health & Family Welfare Department-i metetdaksüogo. MR Scheme kübok temang anepalutsü atema joko magizüktsü.

anepaluba atema taah reimbursement ya MR scheme tejenba küboki aittsü. CMHIS mesüra MR scheme tejenba kübok aliba mozükitem nung temang anepalu süang tesü iba inyakym ya benoktsü.

Reimbursements atema terms and conditions:

Ajisüka CMHIS benoka inyakasngshitsü atema mezüngbo tetsükdaktsü kar adokogo, kong mozükitemi beneficiaries tem nem service agütsütsü memulungba densema lir. Ibayongji shirangertem karbo scheme indang tajanzük magitet aser temang anepaluba taah parnoksa agütsüogo.

Iba ken o bentettsü aser CMHIS (EP) beneficiaries tem parnok angutsü tim tajanzüktem agidaktsütsü asoshi item tetuyubatem agütsüogo.

1. CMHIS mesüra MR scheme tejenba kübok züngoksema aliba mozükitem nung temang anepalu süang tesü, temang anepaluba taah ya beneficiary indang Medical Allowance nungi agizükra temang anepaluba taah ya CMHIS (EP)-i ayimjemsü.

2. Sorak tenzükertem atema, beneficiary tem nungi Medical Allowance magizük tsüngda temang anepaluatoker lira temang

a. Agizükter aliba CMHIS (EP) Health benefit Package rate mesüra Nagaland Health Protection Society (NHPS) kübok State Medical Board-i tetuyuba agütsüba dak ajemdaker temang anepaluba taa reimbursement atema asadangtsü.

b. 2022 küm November 1 nungi 2023 küm December 31 nü tashi nung temang anepalurtem dang reimbursement atema asadangtsü.

c. Reimbursement bushiba applicant temi parnok indang application den NHPS-i prescribe stia aliba kuli kakettem agütsütsü nüngdaker.

Kasa sangdong ajangsa, mezüngoki aliba mozükitem nung temang anepaluba ya jongdak nüngdak apir agiba mesüra züngoksema aliba mozükitem nung shiranger kati nüngdakba procedure maliba ajanga temang anepalutsüsa akümba atema dang asütsü, ta jangjashitsüogo. Iba amala ken o atema State Medical Board nungi jelia temelaba agitsü nüngdaker.



April 04, 2024 nü Mumbai nung Indian Navy temi Somalia nunger tzüym nung auer 9 Mumbai Police ket nung agütsüba sülen tangokba noksa nung angur.

CPI (M)-i Lok Sabha election atema party manifesto sayaogo

New Delhi, Rongchii/April 04 (Agencies): Brihostibarnü Communist Party of India (Marxist)-i taruba Lok Sabha election atema party manifesto sayaogo.

Delhi nung osangbenertem senden ka nung party manifesto sayaba sülen jembidang Party general secretary, Sitaram Yechury-i, taruba election nung party-i takok ngura Citizenship Amendment Act (CAA) agientsü, ta metetdaksü.

Yechury den party lenirtem-Prakash Karat, Brinda Karat aser Nilotpal Basu nungera liasü.

Yechury-i, yimtenren, state, sorkar aser administration nungi tamangba yimsü piladaksütsü atema CPI(M)-i raratsü, ta metetdaksü.

Tesempa o jembiba aser tesempa agi ozüing alema inyakbatem anema ozüing ka benoktsü atema party-i raratsü,

ta paisa metetdaksü. Manifesto nungji CPI(M)-i, state tem nem tanaben linük temzüng nung aliba temeden balala agütsütsü atema party-i inyaksü, kechiyong Narendra Modi sorkari item temedenji kanga meyoctepogo, ta shia lir.

CPI(M)-isa, central sarutem shilem 50 bo state tem nem agütsütsüla aser Governor ji Chief Minister-i benokba tenüing asem nungi ka shimtsüla, ta metetdaksü.

CPI(M)-isa manifesto nungji nija rejutem tashi itdaksütsü aser kumzüksü atema UAPA aser PMLA ama ozüingtem agientsü, ta nangzük.

CPI(M)-isa Jammu & Kashmir union territory nung tekeraba nung state assembly election agitsü aser state jenjang tanaben agütsütsü, ta nangzük.

"Linük nung OBCs (Other Backward Classes) data

tejangja metettsü atema 2021 general census magii aliba agiba mapang nung caste census-a densema agitsüla. Ozüing alema tetsürtem anema inyakba ken otem nung tetsürtem nem temeden agütsüba jenjang tashi itdaksütsü atema tetsürtem nem one-third reservation agütsütsüla," ta manifesto nung shia lir.

"Election nung sen tashi amshiba nokdangtsü atema election inyaktem nung temelenshi alitsüla, ibaji CPI(M) tangatetba. Iba atemaji state funding asütsüla aser corporate-i yimtenren party tem nem tenla agütsüba nokdangtsüla. Democracy tashi aittsü atema corporates-i tenla agütsütsüla aser item ama tenlaji state electoral fund atema agüja amshitsüla," ta CPI(M) indang manifesto ajangasa metetdaksü.

Gourav Vallabh-i Congress toktsür BJP nung aden

New Delhi, April 04 (Agencies): Brihostibarnü Congress party otongdar, Gourav Vallabh-i party toktsüba sangdongba sülen ghonda ishika tsüingda BJP nung denogo.

Vallabh-i shidi ka ajanga Congress Tir, Mallikarjun Kharge dang, Congress party ya alizüing mayuba party ka lir, ta metetdaksü.

Gourav-isa X ajanga, "Tanü Congress party alizüing makai

aoba ajanga ni jangramatemer. Ni Sanatana anema yimyim mayimteter mesüra linük nung rongsen adokdaksürtem anema meinyakteter. Ni Congress party nung menden ajak toktsür aser party züingsem nungi anener," ta metetdaksü.

Television nung linük rongsenkettzüng dak sendakba onüktem nung Congress tenüing nung Vallabh-i o entepa aruogo.

Party nungi anenba shidi ajangasa pai, "Ibayongji party-

i sorkar tashi mangur mesüra opposition shilem tashi itta magiteter. Ibaji ajanga ni ama party nung inyaker ka mepelar. Lenir tainten aser party nung inyakerkem tsüingda apu latsütsü kanga tasak, aser ibaji yimtenren nung kanga tongtibang," ta metetdakja lir.

Paisa, "Party nung inyaker kati indangindanga lenir ka den pei tebilemba melemsateptetra temelenshiji tamakoktsü," ta metetdaksü.



April 04, 2024 nü New Delhi nung Congress lenir, Sonia Gandhi-i Rajya Sabha MP tenangzükba agidang tangokba noksa nung angur. Kasa noksa nung Rajya Sabha Chairman, Jagdeep Dhankhar-a angur.

ST. EDMUND'S COLLEGE, SHILLONG
(Private Post Teachers)
Applications for the following posts are invited:
(a) Psychology (NET) - 2
(b) Counsellor (3-5 years experience) - 1
(c) English (NET), Experience in teaching Phonetics & Prosody - 2
(d) Computer Application (NET) - 1
Accommodation for female (single) person is available for (a) & (b) above.
Kindly apply on or before 20th April 2024 by visiting
Website : <https://sec.edu.in>
ADMISSIONS (2024-2025)
Any student, who registers for admission in St. Edmund's College website, can avail of the online materials for CUET - 2024

Ashwini Vaishnaw densema nisung 14-i RS MP tenangzükba agi

New Delhi, Rongchii/April 04 (Agencies): Brihostibarnü union railway minister, Ashwini Vaishnaw aser taoba mapang Congress Tir Sonia Gandhi na densema nisung 14-i Rajya Sabha MP tenangzükba agiogo; MP tenangzükba agir tanüingba 12 ji Bihar, Odisha, Rajasthan, Andhra Pradesh aser Telangana state tem nungi liasü.

Sonia Gandhi Rajasthan nungi aser Vaishnaw Odisha nungi MP tenangzükba agi.

Parliament building tasenba nung linük tatong Tir aser Rajya Sabha chairman, Jagdeep Dhankhar-i ketdangtsüa parnok nem tenangzükba agidaksü.

Karnataka nungi Congress lenir ana- Ajay Maken aser Syed Naseer Hussain na Rajya

Sabha MP kumogo, Uttar Pradesh nungi BJP lenir R P N Singh aser West Bengal nungi BJP lenir, Samik Bhattacharya nungeri MP tenangzükba agi.

MP tenangzükba agirtem rongnungsa JD(U) nungi Sanjay Kumar Jha, Subhashish Khuntia, Debashish Samantaray aser Madan Rathore nunger densema liasü.

Odisha aser Rajasthan nungi MP tem kümsükji Brihostibar nungi tenzüker aser tanüingba MP tem kümsük Bodhbarnü tenzükogo.

Tenangzükba agiba sentong nungji Congress lenir Priyanka Gandhi Vadra, Rajya Sabha deputy chairman Harivansh aser secretary general P C Mody nungera aden.



April 04, 2024 nü Mumbai nung tang mezüing linük nung CAR-T cell therapy tenzükba sentong nung linük Tir Droupadi Murmu, Maharashtra Angh Ramesh Bais, IIT Bombay Director Subhasis Chaudhuri, Tata Memorial Centre Director Sudeep Gupta aser tangartem tangokba noksa nung angur.

Kejriwal Chief Minister menden nungi agientsü mepishiba court-i magizük

New Delhi, April 04 (Agencies): Tang Tihar Jail nung puoka alisang AAP tongti lenir, Arvind Kejriwal Delhi Chief Minister menden nungi agientsü atema Brihostibarnü benokba temepishiba ken o ka Delhi High Court-i magizük.

Delhi High Court nungi division bench kati, Chief Minister maneni inyaksü, mesüra meinyaktsüji Kejriwal melung, ta metetdaksü.

Tamalena Kejriwal Delhi Chief Minister menden nungi agientsü atema temepishiba ken o ka agüja liasü saka High Court-i magizüki liasü.

High Court-i temepishiba ken o agütsüsang dangji linük temzüng kübok ketdangsertem ajurua temepishibaji agüjang, ta metetdaksü.

High Court-i, "Mapang kaka nungbo nija tebilembaji linük tebilemba dang nungi tilaba südaksütsüla, ajisüaka iba telemtetbaji pai (Kejriwal) agitsüla," ta ashi.

"Onok ya obendangertemi akümba court ka lir. Tamalen-a Court President's rule mesüra Governor's rule benokba nai meteta lir ma?" ta High Court division bench-i ken o benoksang dangji asüingdang.

Temepishiba ken o benoksangji Hindu Sena nung national Tir, Vishnu Gupta liasü. Court-i iba ken o magizükba sülen Gupta-i temepishibaji agienogo, ajisüaka pai maneni kasa ken oji Delhi Lieutenant Governor nem agütsütsü, ta metetdaksü.

(Maneni tapak 8 nung...)



TIR YIMYIM YIMOBILEM (EDITORIAL)

DIMAPUR ROGONÜ, APRIL (RONGCHII) 05, 2024

Taila Advertisement

- Tangsen Lemtur

Sabang balala nung advertise asüba mozü, chiyungtsü aser osettsüset ajakjibo tajung masü saka taila-a aika lir, anungji taila agi asenok meketa aliba putu ka nung asenok kanga sangraa alitsü nungdaka kümogo. India nung coronavirus wara tamajungba mapang 2021 küm February ita nung Ramdev indang Patanjali Ayurved-i yangluba Ayurvedic mozü 'Coronil' ajungkettsüba sentong ka nung Ramdev den atongsema inyaker Balkrishna-i, "Coronil mozü agi anogo 3-14 tsüngda Covid agi shirangertem aneper," ta metetdakja liasü. Iba ama mozü ka ajungkettsüba sentong ka nung taoba mapang Union Health minister, Harsh Vardhan-a densema liasü. Harsh Vardhan ya medical doctor ka, aser Coronil mozü ajungkettsüba sentong nungji pai 'Coronil' indang mejembiyonga pa ama ka iba sentong nung adenba agi nisung aikati atangji Coronil mozü jagi coronavirus tashidak aneptsü ta amang. Ano külen Baba Ramdev-i Coronil ji WHO-ia ajungkettsür ta jembi, saka tesülen WHO-i, "Covid 19 treatment atema yangluba mozü kecha WHO-i review masü mesüra temelaba magütsü," ta metetdakja liasü. Tangbo ajaki meteta tang iba mozü indang jungkai adokogo aser Patanjali mozü dak melung melemtettsüsa kümogo. Drugs and Magic Remedies (Objectionable Advertisements) Act, 1954 aser iba Act nung temzüngtem alema advertisement tiala agütsüba atema tawa Supreme Court-i Patanjali Ayurved anema notice agütsüogo. Mongolbarnü (April 02) Supreme Court-i Patanjali tentetsang (co-founder), Baba Ramdev anema ken o akatsü ta metetdaksüogo. Supreme Court bench kati coronavirus wara mapang nung Patanjali Ayurved-i Coronil mozü ajungkettsüba mapang nung sorkari ibaji mangu ama toktsüba atema sorkara arrtsüogo. Court-isa sorkar dang affidavit nung telangzüba agüjang ta tuyu. Yaküm November ita nunga Court-i iba company dang 'teti atema taneptsü angutsü' ta shia kecha advertise masütsü tuyuba den külemi item ama tenangzüka agüja advertise süra mozü shia nung senchi crore kaka achitsü, ta tekümdangtsü metetdaksü. Ajisüaka company-i kecha hau ta mali anogo ka dang lirbo Ramdev aser company managing director Balkrishna nati osangbenertem senden ka ayongzüka 'tenük, blood pressure, temang ayang-ashi, asthma aser diabetes teti atema taneptsü angutsü asoshi Patanjali mozütem lir', ta sangdonga liasü. Court tetuyuba kecha hau ta mezüngshibaji ajanga Court mezüngmeshiba sayur. Centre nung aser iba company amenoka aliba Uttarakhand state naprongla nung sorkari pusemba ajanga company-i temelung ulua inyaker südi ta Court-i bilemetsüsa kümogo. Meimchir ka takümü taoba ser nung senotsü ajangzüksü atema kecha hau ta melii company-i inyaksangshiba agi tangbo Supreme Court-i alia inyaksüsa akümer. Patanjali indang advertisement tem anema Indian Medical Association-i benokba ken o Supreme Court-i angadanga arudar, aser yakünüa iba ken o angadanga mapang nung court-i Centre sorkar dang, nenoki kechiba Patanjali anema meinyak? ta asüngdanga liasü. Meimchirtem temang anema alibaren dak sendakba nung sorkari tejak repranga kecha tenokdanga makai sadem-sadema inyadaksüra takoksa tulu angutsü.

OLEMSABANG

ASENOK JAKDANG ANO ELECTION KA ARUDAR

~ R. Nungshi Longkumer

Election ta asüba mapa ya nüburttem rongnungi lenir, tanishir shimtetba mapa ka lir. alima sünga meimchirtem mezüngdangtet aliba purtem rongnungi temeteter, tetemsü nisung ishika shimtetter parnok sulenji nüburttem ayipjanga anisüngzüka pelaseta liyonga aotsüba lima nüburttemji asneok lir. aji oda mesüra shiruru nungzütepba senzüba amai asütsü. Saka asenokbo shiruru masü nungji asenok rongnungi yimsüsür, lenir shimteta parnok nemji khuret ajak nungloka yutsür asenok kecha shisabulu makai liyonga aor. Yamaji yimtsüng shia Pusu menden melentepba, towntem nunga mapangtem melentepba arudang yimsüsütsü aser nüburttem lenitsü shirnok dak tashi keta ngudir parnokji shimteter len anidaksür, parnok nemji yimsüsüdaksür. Oda adianu tsüngta nungasüng tambo tanubo ta kecha mali kati ka dang na tetemsüba-ar asen kin nungi yimsüsürji na süang ta yimli agütsütepba inyaker. Aser itempuri kodang yimsü südir pei yimtsüng nungji nüburttem ajepba mali saka Pelaseta temaotsü manung dang liyonga aoba angutsü. Saka yimsüsür kar nüburttem memeimba saka pei atema dang bilemba agi yimsü junga mesüteter aser parnoki aniba nüburttemji kodanga tepela tesünep nung malitsü. Saka par telok nungjibo teti rongrongshirong, mepütep, tsüchitep agi dang sünger alir. Idangjibo par yimtsüng nungi par telok nungi temoatsütemji jena oadokba asenoki aika ajuruogo aser aika nguogo.

Kasaji asen Naga kin ajunga asoshi yimsüsür shimba Nagaland Legislative Assembly aser ano Member of Parliament (Lok Sabha) nung mener Naga nüburttem asoshi ramoka yimsüsütsü shimba koba dang election ta ajar iba mapaji asneoki mapang shia ajurur aser iba election mapa yabo anogo mapang kodang tonga arudir yimtsüng shia nung polling station yanglutsü aser polling station shia polling box yur itemji ketdangsertemi anepalua asenoki bener aoba vote-ji bendentsu. Nüburttemi pei senti vote kakaji Tsüngrem dang sarasadema ajemalua arua pei voteji agütsür kulen teshimtetsüabajibo Tsüngrem nem nunglokja yutsür pei-pei kidangi oa ajemajema anisüngzüka kazütsü. Election temer vote-temji azüngdang Tsüngremi shiba mulung, shiba temsüa ali pa/la vote ka agi mesüra oda timba ser shimtettsü. Idangjibo rongsen teraka melalu, rongrongshironga kecha mali shinga tai tilaka memena maparen tempangtsü. Yangji nüburttem ajanga Tsüngremi shirnok shimtettir parnokia Chuba menden nungji, yimsüsüba menden nungji ajongketa mener pelaseta nüburttem madak yimsü asütsü aser centre Government nungi koba senotsü arudir, kwi arudir nüburttem atema inyaksü, ano asen Naga lima yaa hon-a inoka yanglu ama yanglutettsü.

Saka dang tashi nung asenoki election nung sen indokba, rongsen laluba amaisa inyaktep nungbo asen Naga limaji tamajungtiba rongnung ka akümtsü ana nung lir ta reprangteter. Asenoki election nung sen indokba ya mezüngdangtettsü südi. Election canvassing tenzucker ita ka tsüngda nung sen indokba züngdana bendendang nung bosta aika asüngtsü saka iba senji kecha nunga menungdak asünungji ongken nung tuoka yutsü amai dang asütsü. Election temer kulen repranga aru nung ita 5-6 shi nisung aika takar amai senzüa angu saka dangbo sensaker kümaogo ano aika meshimetsür kümaogo. Yi agia nisung aika rongseta/jemseta süogo. Ya shiba taiyong itemi ajurur ken jungjunga shisadangtsü mapang tongja tongaogo ta bilemer.

Hau ni, election mapa nung tai tilakata meinyaki ochi agi inyaker aika lir aser itempur temoatsü manung asen limaji anarongdena nokdaka lir ta metetdi, saka ano tamajunger aikasa ali nung asenok den tamakok, teraksa item ya ajurujen ajurur masü no tasa bilemer. Süra item telok ana rongnungji na aser nia koba telok nung aden? Ken jungjunga meyipa reprangshidi arungma. Election mapang shia arutsü iba mapang ochi agi shidak inyaka temoatsü angurtem rongnung adentsü asü mesüra adakatem angur rongnung adentsü? Tematiba Tsüngrem ajak metetsang asen mapatemji ngua ali nung Tsüngrem akum tsübua mapatemji inyakdi ni ta lemsateper.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

ADVERTISEMENT

Impur Bible Seminary nung tesayur mapa inyaksü atema temsüa alirtemi agüja aliba Department nung apply asütsü jaoker.
 Department : 1. Old Testament : 1 post
 Qualification & Criteria : 1. Senate of Serampore College/University nungi M.Th degree alitsüla.
 2. College/Seminary nung tesayuba mapa nung aliba mesüra Arogo tenzükba wadang nung inyaker asütsüla.
 Rongchii (April) 30, 2024 tashi nung application Executive Secretary, ABAM, Impur-798615, Mokokchung, Nagaland address süa aser copy ka Secretary, Education & Literature Ministry, ABAM (Email: liteduabam@gmail.com) dangi tejangja Bio-data, contact number, Transcript aser Certificate Class X nungi M.Th tashi (xerox) yoktsü.
 Temsüa alirtem office ajanga personal interview ajatsü.

**Secretary
 Education & Literature Ministry, ABAM
 Impur, Nagaland**



April 03, 2024 nü Haiti yimtiba, Port-au-Prince nung prangpong amer telok kati Holy Spirit (The Spiritans) Arogoi ketdangsüba Minor Seminary of Saint-Martial amakba mapang nung tangokba noksa nung angur. Iba seminary nung alirtem ajak jena otet, ta Aid to the Church in Need (ACN)-i metetdaksü.

ANOGO ABEN TSÜNGREM DEN

Temeimtsü maketba meimang

"Saka adianu meimtepba indang nenok dangi zülutsü tenüngdaksü maka, kechiaser medemer o medemer na meimteptsü Tsüngremi nenok dang sayur". 1 Tesalonika 4: 9.

Mission field nung tebilemstü tulutibaji kechi ? Telangzüba tajungtibaji, Arogo nung tebilemstü tulutibaji kechi asütsü ? Atangji, arogo nung kati ka dang memeimtetba ajanga mission field nung tebilemstü adoker.

Arogo nung telemsaji tsükchir takok tulutibaji lir. Arogo nung rongrong, mangatettep aser o atsütepba mamangertemi angashir. Pa ni mangatettepi aliba telok ka nung adentsü menüngdak ta lemteter.

Shirrnoki tangar den jangyu medema mouteter, kasa nisung jagi pa temetetbaji ano tali telemsa adokdaksüba mapa nung amshitsü meranger. Telok shiai pei meden bushitepa kuli bendentsü aser tanela jenjang nung parnok tajungba ta bilema tangarji mezüngmeshitsü.

Iba tesayuba ya kodang tamanger kati Khrista pei Kibur ta agizüker, iba nungji kati ka dang meimtsübaji keta aliba jakla ka lir. Tasen akümba mulungsentsü, Tanela Temeshi aliba, aser Khristai asenok dang meimteptsü bilemtetdaksür. Tanela Temeshi tejang temeim lir.

Oba, tamangertem rongnung meimteptsü ozüng agütsüba asoshi Ne tenüng asanger.

NBCC-i ghonda 152 sarasadem inzü onüktem lemsateper

Dimapur, Rongchii/April 04 (TYO): Nagaland Baptist Church Council (NBCC)-i taruba General election atema aser Khristantem tsüngda telongjem alitsü atema April 12 nungi tenzükba ghonda 152 tashi sarasadem inzü ka ayongzükogo, aser iba dak sendakba nung maneni parnoki sangdong tasen ka ajanga sarasadem onüktem lemsatepogo.

SHISADANGTSÜ ONÜKTEM:

1. Asenoki Pa Kibuba ta agizükdi. Kodak aser alima yanglusangji Pa, aser Pa ket nung ajak lir, ta asenoki mamadokli.
2. Asenoki asen tamakoktem, tashi aser takoktemji Tsüngrem nem bendanga agütsüdi; ibaji ajanga Pai asen linük aser asen lima nung Pa tashi sayutsü atema asenok amshitsü.
3. Asenoki ajemalushir asen temenen aser asüküm nangzükba temelung meyipdi, kechiyong Pa medenibo asenok tazüngla dang.
4. Asen Teyanglur Tsüngrem medenibo asenok ya tazüngla, anungji asenoki Kalvary Kangki matsüngdangi arua Khrista azü ajanga agütsüba tashi meshidi.
5. Tamang ajanga asen linük aser asen lima nung tesüngmangtsü ataloktsü, ta asenoki amangdi, kechiyong Yihovah Tsüngrem, Abraham, Isac aser Yakob Tsüngremji India nunger aser Naga nunger atema-a kasa Tsüngrem lir.
6. Asenoki Tsüngrem dang asen tamang tashi meiti

7. Asen nüburttem tiyazü tenangzükbatem nungi kümzükang ta sarasademdi.
8. Iba lima nung temenen madak takok angutsü aser Tsüngremi asen lima nung sayatenya mapatem inyaksü ta asenoki amangdi.
9. Asenoki temelenshi aginüba ama asenoka melenshitsü nüngdaker.
10. Asenoki sen meimba aser konang aginüba nungi ajentsüla.
11. Asenoki tetsübu indoktsüla saka Tsüngrembo tsübuttsüla.
12. Tang tensa nung asenoki tindang taküm alitsü nüngdaker.
13. Na melenshira aser ni melenshira Tanela Temeshii asenok dak mapa inyaksü.
14. Asenoki asen sasa asen nija ajungketba aser telok ajungkettsüba anener Tsüngrem yimli atema inyaksüla.

INDIA ATEMA SARASADEM

India nung asen lenirtem teimbaka Khristantem masü, ta asenoki meteta dang lir. Ajsüaka asenoki sarasadem tashi nung tamang kadi. Chichia sarasademba ajanga temelenshi adoktsü ta asenoki amangdi. Asenoki taküm alisang Tsüngrem tashi ajanga asen linük amokbangdi.

1. Tsüngrem aser Tanela Temeshi ajanga mapa inyaksü atema asenoki asen lenirtem atema s a r a s a d e m t s ü d i .

1. Tsüngremsa tulutiba. Tsüngremi parnok len anitsü atema asenoki sarasademtsüdi. Par yimsüji taila saka asen Tsüngrem ajanga parnok den jembitsü aser parnok aibelentem parnoki metettsü atema sarasademtsüdi.
2. Tang agiba election mapang nung Tsüngremi Pa tashi jungkai adoka sayutsü aser India madak Pa tashi aliba sayutsü atema sarasademdi.
3. Sensakertem aser tashi maitertem meimba lenir tajungtem aser nüburttem tsübuttsü atema asenoki sarasademdi.
4. Pei nija tajangzük atema ozüng alema inyaksü merangertem tamakok angutsü atema Tsüngrem dang sarasademdi.
5. Hindu linük kija asütsü, right-wing teloktem tangatetba ya tebilemstü onük tuluka kümogo. Parliament aser Cabinet ya tenüng ka ama dang kümogo. Joko nüburttem atema teimlaji Judiciary dang lir saka iba ya-a tashi meiti akümer ama reprangteter. Police aser bushisüngdangba agency tem matsüngdang Khristantem takoksa angur. Shisaliok rejutem aser shisaliok mapatongtem jenjang raksatsür. Temeim melen tetsübu aser tesempa lir.
6. Right-wing teloktemi minorities maneni amokmerener aser asenok

7. India nung 18buba Lok Sabha election agia lenirtem shimtsü mapang ana nung aliba mapang nung lenirtem tiyazü tenangzükbatem masü saka anogo shia nüburttemi ajangshiba timtem balala atema jembia inyaksü atema sarasademtsüdi.
8. Tsüngremi linük nung Khristantem, minorities aser tekübok jenjang nung alirtem kümzükang ta sarasademdi. Ochi jembitsü atema tasü itdakjang aser tan election nung shisa kaa vote agütsütsü atema sarasademdi.
9. Reshikangshiba Arogo atema sarasademdi, kechiyong tang ama election mapang nung Arogotem anema melamela inyaksü akok.
10. Election mapang tesempa aser rara malitsü saka yimjung alitsü atema sarasademdi.

NAGALAND ATEMA SARASADEM

Asenoki India atema sarasademba dang masü saka asen state aser lenirtem atema-a sarasademtsü nüngdak.

1. Asen lenirtem ya Tsüngrem tsübuttsü lenirtem asütsü, aser tan election nung shirnok shimdir shimaka Tsüngrem aser nüburttem den sendaktepa aliba lenirtem asütsü atema sarasademdi.
2. Tsüngremi asen lenirtem den jembitsü aser tsükchirtem jangjatsü atema

3. Asen lenirtemi Tsüngrem tsübuttsü atema sarasademtsüdi.
4. Tsüngremi asen lenirtem akasodakjang ta sarasademtsüdi.
5. Asen lenirtemi Tsüngrem tama sädaksütsü, iba sülen parnok nem tashi agütsüba nüburttem tanabuba sädaksütsü atema parnok nem shisatsü agüjang ta sarasademdi.
6. Tsüngrem tsübuttsü tanela aser nüburttem meimba tanela parnok nem agüjang ta asenoki sarasademtsüdi.
7. Parnok temelung meyiptsü atema sarasademdi.
8. Tsüngremi parnok dang taochi sayutsü aser Pa chichi bushirtem dang Pai taochi sayutsü atema sarasademtsüdi.
9. Parnoki pei sasa miim ola angatsü aser parnok mapa nung temelenshi alitsü asoshi sarasademtsüdi.
10. Asen lenirtem kija agibo asen lima nung temelenshi bener marutettsü ta parnoki metettsü atema sarasademtsüdi. Lenisüba menden ya sempet ka aser nüburttem tenzüktsü atema maongka, ta lenirtem nem angatetdakjang ta sarasademtsüdi.
11. Naga nunger rongnung telongjem alitsü atema sarasademdi.
12. Kin shinga tsübuttsü atema asenok tsüngda kati ka dak tamang katettsü atema asenoki Tsüngrem dang teyari meshia sarasademdi.

AO OSHI ANGAZÜKDAK:
TANÜ ANGAZÜKTSÜBA OJANG



Süklep

(n) tebensang agi asadangba (a measurement from elbow to tip of hand)

* Onoki tongshi ka metong nung süklep 10 apur aru.

Süksa

(v) teka agi süng ama oset tatsütsü kümdaktsüba (break wood type material into pieces)

* Mapa inyakerteri süng süksar mi apuset.

OLONG PAITEP # 6747

15x15 crossword grid with numbers 1-16 indicating starting positions for words.

TIPIEN

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T ___ lu - (3)
- 10. Takdang temalen - (9)
- 11. Tesa ___ a - (3)
- 13. Ajungbena temulungjang tongtonglatsü atu - (5)
- 15. Tejen lai nung tesayur - (5)
- 16. Tsüngsak-mopung - (5)

LANGTSÜNGLEN

- 1. Reprangdaktsü - (4)
- 2. ___ ur - (3)
- 4. Kiojen yangludak - (6)
- 6. ___ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüng tajemetdak - (6)
- 12. ___ adenshi - (4)
- 14. Tsünüsenbongtsü adokdak - (3)

OLONG PAITEP # 6746 TELANGZÜBA

TIPIEN :

- 1. Kasa, 6. Rangben,
- 7. Mait, 9. Poktet, 11. Ati,
- 13. Atasa, 16. Rür, 17. Rajang,
- 20. Lanu, 24. Nüngjem,
- 25. Süra.

LANGTSÜNGLEN :

- 1. Khu, 2. Süjak, 3. Onük,
- 4. Oba, 5. Anü, 6. Ratet,
- 7. Mozü, 8. Ita, 10. Tar, 12. Tinu,
- 14. Salem, 15. Aja, 18. Anünü,
- 19. Taju, 21. Ano, 22. Onü,
- 23. Kua.

Tepela Tasoba Anogo

Tanur asoba anogo nung salem osang den noksa angati adokdaktsünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

1. Tenüng :

2. Tasoba anogo:

3. Küm : 4. Class :

5. School :

6. Talidak :

7. Salem osang :

Tanur asoba anogo nung salem osang den noksa angati adokdaktsünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

Meitei nunger lokti tentetemi LS election thinentüsü mepeshi

Imphal, Rongchii/April 4 (Agencies): Meitei nunger lokti tentet balala tenüng nung nokdakba Delhi Meitei Coordinating Committee (DMCC)-i, Election Commission of India (ECI) aser Chief Justice of India (CJI) dang Manipur nung Lok Sabha election thinentüsü mepeshia asüngdangogo, kechiyong state nung tang kin o kin tsüngda mangatetep adoker lir.

Inner Manipur aser Outer Manipur Lok Sabha menden atema election April 19 aser 26 nü agitsü aliba ya tebilemtsü ka kümogo aser talisa Outer Manipur Lok Sabha menden koba anogo anaprongla nung agitsü lir, iba tesem nung

security dak sendakba nung tebilemtsü akar.

April 1 nü temepishiba benokba nung DMCC-i, election agitsüba anogo thinentüsü atema kuli kar agütsüogo, kong mangatetep adokyonga aoba aser temzüng ozüng benokertem atema tetsükdaktsü adokba indang media osang balala kuli densema lir.

DMCC-i ashiba agi, taoba küm May 3 nü nungi Manipur nung azütokshi lendong tenzükogo aser iba ajanga nüburtem shitemang, tekelok shisatsü dak kongshiba dang masü saka state rongsenketzüng aser yimden yimsüsüba dak kongshio.

Election commission team kati Manipur nung Lok Sabha election atema renemshiba asadangtsü atema state semdangba mapang ka nung DMCC-i iba temepeshiba agütsüogo.

State ketdangsürtemi EC team dang election agitsü atema parnok renema lir ta metetdaktsüogo aser kasa mapang nung iba team yagi tsüngtong oa tesem balala asadangogo.

DMCC-i ashiba agi, Meitei aser Kuki-Zos kintem tsüngda mangatetep adokba sülen tang tashi nung nisung 122 tepsetogo aser iba ajanga Meitei, Kuki nunger aser Manipur nung tanga kin tem daka kongshio.

Tripura Congress Tir-i BJP pusemertem anema jenjang tapet agitsü akhang

Agartala, Rongchii/April 4 (Agencies): Congress party nungi Asish Kumar Saha-i, Tripura chief electoral officer (CEO) Puneet Agarwal dang April 2 nü BJP pusemertemi Congress indang publicity gari raksatsüba anema jenjang tapet agitsü atema shiti ka züluogo.

Saha-i ashiba agi, iba ya model code of conduct (MCC) anema lir aser Bharatiya Janata Party (BJP) den sendaka alirtemi tasa asa inyakba lir.

April 02 Congress indang wako, banner aser poster inoka aliba publicity gari ya BJP den sendaka alirtemi tashiyim agi anir oa liasü, ta Shah-i ashi.

Tenük kuli agütsürtemi ashiba agi, Pradip Debnath-i ania aliba gari ya Tripura, West district kübok Kali Bazaar nungi Brinda Chowmuhani nung arem kati anir oa liasü.

"Brinda Chowmuhani nung BJP den sendaka aliba nisungtemi gari nung inoka aliba wako, banner aser poster tem raksatsü," ta Tripura CEO dangi züluba shiti nung Shah-i shia lir.

Paisa, "parnoki electoral inyakyim anema jenjang agia aser democratic principles tem sentoka toktsür item osettem mi agi rongtoktsü," ta ashi.

"Iba inyakyim ajanga election atema inyakyim nemtsüba dang masü saka election inyakyim nung sendaka alirtemi lendong nung toktsür," ta Tripura Congress lenir yagi ashi.

"Iba ken o ya tangsa tang bentettsü nüngdaker, kechiyong BJP den sendaka alirtemi democratic values temulung nung kongshio. Maneni yimden yimsüsüba tsütsü parnok den toktepertem aser parnok indang nüboyimba

sentong nung amshiba osettem raksatsüba ya linük nung election kecha tetsükdaktsü makai sadem sadema agitsü atema benoka aliba temzüng ozüng anema inyaksangshiba ka lir," ta pai ashi.

Tripura Congress Tir, Asish Kumar Saha-i CEO dang iba ken o ya takaratiba nung bentettsü mepeshia metetdaktsüogo.

"Iba inyakyim nung densema alirtem takaratiba nung aputsü mepeshir ajita asünungdang iba amala inyakyim nung shilem agirtem tai matoktsü ta osang tejangja ka agütsütsü. Iba den bendenloksema ni iba tashishiba anema jenjang agiba indang aser iba amala tatalokba nokdangtsü atema jenjang agitsü aliba indang osang ka aginer," ta Shah-i shiti nung shia lir.

Manipur police-i nisung ka khaseter lia ngutetogo

Imphal, Rongchii/April 4 (Agencies): Manipur police-i Brehostibarnü (April 04) injang agi aiben khar aliba tebur ka tasümgang ngutetogo.

Bank nung inyaker kati sen crore 2 aser hon agi yangluba azük aser keru balala bener ajenba bushitettsü atema state ajunga nung osang agütsür aliba mapang ka nung iba ya atalokogo.

Manipur police indang forensic expert temi arishi küm 25 nungi 30 tsüngda asütsü ta bilemba tebur ka tasümgang Brehostibar anepdang Lilong police station kübok Waithou nung national highway 102 anasa nguteta liasü.

Tasümgang ya post-mortem examination atema JNIMS hospital morgue-i benerogo.

Iba nisungba ya kechiba tepset iba indang osang tejangja memetet aser pa tepsetba indang shingaia nangzüka mali.

State Bank of India (SBI) Bishnupur branch nungi ketdangsür tejen ka sen crore ana bener ajenba indang state ajunga nung Manipur police-i osang agütsür aliba mapang ka nung iba tasümgang nguteta liasü.

Bodhbarnü bank ketdangsürtemi Manipur police nem tashishiba agütsüba nung samara bushia alisang arishi küm 41 tain Laishram Monarch Grace ya Imphal West district

kübok Kodompokpi Maning Leikai nungi lir ta shia lir.

Grace ya SBI indang senior assistant manager liasü aser pa March 2 nü nungi office-i marur. Pa nem bank indang sen crore 2 aser sen lakh 50 alang hon agi yangluba azük aser keru amala achaayangtsü nonglokja liasü.

Pa den tongteprateptsü merangka tang tashi mesüteti arudar.

Tashishiba dak ajemdaker police-i FIR ka benoka bushisüngdang tenzükogo aser samara alisang bushitettsü aser auyar aoba sen aser oset meyipa agitsü atema osang agütsüogo.



IMPHAL: Manipur nung Lok Sabha election magi tsüngda central aser state force tem longjemer meita aoba mapang Churachandpur nung prangbong injang, bomb aser tanga hadirtem aika ngutetogo, ta ketdangsürtemi Brehostibarnü metetdaktsü.

Menoknok nung nisung 1,000 yiru: Taiwan



Taipei, Rongchii/April 04 (Agencies): Taiwan nung küm 25 tsungta menoknok tesashitiba anakba lendong nungi takum jenbua alirtem bushiba manener.

Bodhbarnep Taiwan anüdoklen menoknok magnitude 7.2 anakba sülen Brestostibarnü tashinung nisung asüba 10 aser yiruba 1,038 tejangja lir. Nisung 52 shi samar bushir.

Ketdangsürtemi Hualien nung rangloker teyari agütsür, kong ki aika mangadaka lir, apu aser longpok tem chirep aser long aser ali anenzüka aluba ajanga lenmangtem raksar lir.

Nisung telok ka Taroko National Park nung anepdang senzüa lia menoknok anakba ajanga long anenzüka alua nisung asem südaktsü.

Iba park nungi madokteti alitsü südi ta temulung melemi bilemba nisungtem bushia kumzüksü atema drones aser helicopters amshir, ta National Fire Agency ajanga ashi. Iba park nung aliba hotel kati aodang yangji inyaker nisung 38 samaba külemi inyaker kar ngutetba sülen metet.

Taiwan ya Eurasian Plate aser Philippine Sea Plate tsungta tectonic boundary nung lir, kong menoknok ya tang tasen masü aser menoknok nungi jenbua alitsü kanga junga renema lir, ajisüaka Bodhbarnep anakba menoknok ya kanga tesashibo masütsü ta menoknok asadanger temi bilema liasü.

Japan indang meteorological agency ajanga

7.5 magnitude aser US Geological Survey ajanga 7.4 magnitude ta ashiba menoknok ya Hualien south tsütsü kilometre 18 shi pilar anoka liasü. Iba menoknok mechi kilometre 100 dak tema pilar Taipei nunga aoksatep, kong ki kanga sashia anakshitsü aser southern Japan nungi Philippines tashi tsunami adoktsü tekumdangtsü sangdonga liasü.

Iba menoknok anakba sülena 'aftershocks' aika liasü ta ketdangsürtemi ashir.

Iba menoknok ya nisung kar atemabo Taiwan nung 1999 küm menoknok tesashi ka anakba bilemteta liasü. Iba küm menoknok ya magnitude 7.6 anoka nisung 2,400 shi asü aser 10,000 dak tema yiru.

Russia-i Kharkiv yimti amakdang dangar kumzükba mapa inyaker asü

Kharkiv, Rongchii/April 04 (Agencies): Russia-i Ukraine anüdoklen Kharkiv yimti nung nisung aliba ki nung amakdang nisung pezü asüba nung rescue workers tem dena liasü ta Ukraine ketdangsürtemi ashir.

Kharkiv Mayor Igor Terekhov-i Brestostibarnü Telegram app nung ashiba agi, Kharkiv district nung nisung aika aliba tesem nung taoba mapang bomb pokloksür alidak amakdang nisung 12 yiru.

Asürtem rongnung nisung asem tekumzükertem liasü, shirnok iba jakdang amakba nungi nüburttem kumzüka yaritsü arua liasü, ta Kyiv Post ajanga ashi.

Kharkiv ya kasa tenung nung aliba region indang yimtiba lir, koba Russia den arütsü nungi mile 19 (kilometre 30) shi pilar lir aser Moscow-i February 2022 nungi tenzüka Ukraine maka arudang iba yimti nung mapang shia bomb pokloksür.

Ibai tesempatsü aser dangar asoshi mebilemi pei ajung asaa amakba lir, ta Ukraine Tir Volodymyr Zelenskyy-i ashi.

"Kharkiv aser asen nüburt anema tashiyim amshiba ajunga Russian kiralongrar tai lir. Ukraine indang air defense tashi itshiba ajanga nisung takum kumzüksü," ta pai X nung ashi.

Social media nung noksa prokshiba nunga nisung aliba ki raksaba den ambulance ka aser fire truck ka raksar aliba nguogo.

Iba yimti nung drone 15 shi amshia aonung tepiyong amak saka karbo khazüka yok, ta Kharkiv indang Governor Oleg Synegovov-i ashi.

Iran-i yangluba Shahed drones amshia amak, ta pai ashi.

Yirur alirtem rongnung nurse ka dena lir aser 14-storey building ka amakdang arishi küm 69 tain tetsür ka asü, ta Synehubov-i ashi.

Ajisüaka Russia-ibo asaa civilian dak tenük yoker mamak ta ashir.

Taoba hopta Russian sepaitemi iba yimti nung aerial bomb amshia liasü aser iba mapang nisung ka asü. Ita tetenzüklen industrial area nung missile ka khaloktsüba nung nisung pongu asü.

Tawa-tanü Russia-i electricity aser danga infrastructure nung amaker, aser nisung meyerijang aika power mali tim atemer.

Kharkiv aser temeket region nung alir nisung 350,000 shi power supply mali timtemer, ta Ukraine indang Ministry of Energy ajanga Telegram nung ashi.

Ukraine ketdangsürtemi par tembar linüktem dang anti-aircraft defence systems tali agütsütsü ajungshir.

US-i Ukraine nem mitkar asoshi teyari agütsüba akonger, aser sen billion \$60 jenjang teyari agütsütsü aliba Congress nung anendaka lir, koba Republican temi kanga memulunger.

Benny Gantz-i Israel nung election agitsü ajungshir



Benny Gantz

Tel Aviv, Rongchii/April 04 (Agencies): Israel war cabinet züngsem Benny Gantz-i September ita election agitsü ajungshir, kechiaser Gaza nung raraba mechi linük telungzük aser bendang lima nung alirtemi Ato Kilonser Benjamin Netanyahu'er sorkar dang mepelar.

"Nai dang mulungra September ita elections agitsü asoshi asenoki anogo ka latettsüla. Iba ama anogo latetba ajanga asenoki mitkar inyakyim maneni litettsüb aser Israel nüburttem dang parnoki asenok dak tamang akaba asendenshitsü ta sayutettsü," ta Gantz-i Bodhbarnep television ajanga ashi.

Tawa Israel nunger

meyirijang aika yimtung nung adenshia election tasen agitsü takhangba agüja liasü. Aikati Netanyahu aitsü aser ita trok tashi Gaza nung Israel nunger 134 pua aliba magizüketba atema par sorkar dang jashiba sayur.

Israel nung ato kilonser mapa talangtiba inyaksang Netanyahu-i elections tangbo magitsü ta shijen shia arur, kong pai tamakok angutsü ta opinion polls ajanga ashir, aser rara tiyong nung election agira Palestine nunger Hamas telok nem sempettsür dang asütsü ta pai ashir.

Bodhbarnep par Likud party-i rara mapang Gantz-i 'petty politics' masayatsüla, ta ashi. "Tang elections agira Rafah nung rara alidak telemsa,

teraksa adoktsü aser marakzütettsü aser pua alirtem tanaben kidangi anir arutsü maongka raksatsü," ta Likud ajanga ashi.

Taoba mapang army general inyaka alisang Gantz-i mepetmesü mapang yimten tsütsü telungjem sayua rara tetenzüklen Netanyahu'er sorkar nung aden. Polls agitepba nung election mashi nung par teloki takok angutsü aser pai ato kilonser menden melentsü, ta ashir.

Netanyahu-i pua alirtem kidangi anir arutsü aser Hamas samatsütsü nangzüka lir, ajisüaka Israel-i aji komasür inyaksüar mejangja.

October 7 nü Hamas-i anir Israel south tsütsü maka nisung 1,139 tepsetba den külemi Israel nunger aser bendanger 250 shi pua bener aoba asoshi security tsütsü tamakok alu ta Netanyahu'er sorkar aitsür. Israel-i Gaza amakba nung nisung 32,975 shi tepsetogo aser itemji timba tetsür aser tanurtem lir ta Palestine ketdangsürtemi ashir.

November ita Israel aser Hamas tsungta khen atema rara anena ataba mapang pua lir nisung 100 dak tema chiok aser

iba melen Israel nung tepuokdak yua aliba Palestine nungera aika chioka liasü.

Israel aser Hamas tsungta asendenshir yimjung ken o jembiba nung terenlok tera aliba ajiteter, aser telok anaprongi akangbatem tangatettep kati arutsü ama yimya kar ajanga sayur.

Gaza nung rara mechi tesem balala nung jenoka alirtem pei kidangi meyipa shilangtsü asoshi Israel-i tai apuba ya jembishinü terenlok maliba kuli tongtipang ka lir, ta Qatar ketdangsüri Bodhbarnep ashi. Kasa mapang Hamas-i pua alirtem chioktsü atema parnoki 'conditions' agüja aliba memelenshitsü ta ashir.

"Ita trok sülen sorkari Bibi Netanyahu ya tetsükdaktsü ka ama angateter mesüka lir," ta Hamas-i pua alir Gadi Moses jala kinungbo Einav Moses Deobarnü longkak aيتدang ashi. "Pai parnok khenyongi anir mariner amai lir, aser yamaji parnoki iba mission nung tamakok angu."

Netanyahu ya hernia surgery agitsü lia linük den television ajanga jembidang, kinungertem jashiba angateter, ta pai shia liasü.

Elections tasen agiba ajanga Israel ya ita trok nungi ti tashi marakzüteti akumtsü ta pai ashi.

Mitkari alilen nungi Rafah amaktsü ta Netanyahu-i nangzüka aliba nenshia ashi. Rafah ya Gaza south tsütsü yimti tuluka lir, kong Gaza nütsüngyongsük million 2.3 dak tema tesem balala nung raraba jena arua iba yimti nung jenoka lir.

"Rafah-i mai tashi takok mali aser US-i iba yimti mamaktsü ajungshiba ajanga tetsükdaktsü majurutsü," ta pai ashi. Israel indang Central Elections Committee ajanga parliament asoshi taruba vote ya October 27, 2026 nung agitsü lateta lir.

Bodhbar aonung nungi Israel sepaitemi occupied West Bank tesem ajunga meita aodang tetsür asem densema Palestine nunger nisung 40 puogo, ta Palestinian Prisoner's Society ajanga ashi.

Parnok ya timba Jerusalem governorate nung apu aser kar Ramallah, Hebron, Bethlehem, Jenin, Qalqilya, Tubas aser Nablus yimtitem nung apu.

October 7 nü nungi tenzüka Israel sepaitemi occupied West Bank nung Palestine nunger 8,030 dak tema pua lir.

Pakistan-i volleyball asayamung ka atema India jaok

New Delhi, Rongchii/April 4 (Agencies): Pakistan Volleyball Federation (PVF)-i, taruba ita Islamabad nung asayatsü aliba Asian Challenge Volleyball League nung shilem agitsü atema India jaokogo.

PVF tekolakba Chaudhary Yaqoob-i, continent nung temaba jenjang nung aliba team tem ajak iba asayamung nung asayadaksütsü tejangraba aliba lemsatopogo. Iba asayamung ya May 11 nungi 17 tashi asayatsü.

"Kanga merangdangba

sülen Asian challenge volleyball championship ayongzüka asayatsü atema bid asüba onoki kokogo, aser May 11 nungi 17 tashi asayatsü aliba asayamung nung continent nungi team tajungtibatem toktepba reprangner," ta ashi.

Saisapong tanüla ajungkettsü nükjidong yur PVF-i tanga linüktema jaokogo aser Iran, Sri Lanka, Bhutan, Turkmenistan, Afghanistan, Kazakhstan, aser Kyrgyzstan nungeri iba asayamung nung shilem agitsü jangjatsüogo.

Iba asayamung nung team

10 nungi 12 tashi-i shilem agitsü imla atadar.

Asayamung atema renemshiba mapang Pakistan nunger asayartem parnok sempet sayutsü atema tang Islamabad nung training agiba mapang ka lir

Asayamung atema jaokba linüktemi telangzüba tajung agütsütsü PVF timla lir aser iba ajanga Asian Challenge Volleyball League ya teti menongra bilemtettsüsa asayaba asayamung ka kümdaksütsü, ta kasa sangdong ajanga metetdaksü.

South Africa nunger football asayar Luke Fleurs khaset



Rongchii/April, 4, 2024 (Agencies): South Africa nunger football asayar Luke Fleurs, gari auyatsü merangba mapang khasetogo, ta police-i ashi.

Iba lendong ya Bodhbhar aonung Johannesburg kübok Florida tesem nung petrol station ka nung ataloka liasü.

Arishi küm 24 tain Kaizer Chiefs nungi asayar ya totzü inoktsü ata aliba mapang prangbong bener nisung ka arua pa dang gari nungi kimai adoktsü ozüing agüja liasü.

Fleurs dak injang khaloktsüba sülen temulung melemer rongnung kati pa indang gari bener oa liasü.

"Ken o nung temulung melemer bilemba nisung kati pa dak prangbong tenoktsü aser gari nungi kimai anizükba sülen pa temang nung injang khalokja liasü," ta Gauteng police otongdar Lieutenant Colonel Mavela Masondo-i osangbenertem dang ashi.

Kaizer Chiefs ya linük nung nüngtugu club tem rongnung ka lir aser parnoki league champions 12ben bona lir. Club sangdong ka ajanga Fleurs asüba ya kanga dang tesusatsüka aser takoksa tulu lir ta shiogo.

Club-isa, police-i ken o bushisüingdangdar aser tarutsü nung osang tejangjaba metetdaksütsü, ta ashi.

Sports Minister Zizi Kodwa-ia, ozüing alima inyaksangshiba

maparen ajanga ano nisung taküm ka samaba atema kanga temulung koremer, ta ashi.

Defender Fleurs ya taoba küm Kaizer Chiefs nung aden. Iba masüdang pa SuperSport United nungi asaya liasü.

Taoba Under-23 international asayar ya South Africa tenüing nungi 2021 Tokyo Olympics nung asayaogo.

Pa senior national team nungi khen danga asaya mali, ajisüaka osang ajanga ashiba agi pa senior team nungi asayatsü ana nung liasü.

Pa 2013 küm mezüingbuba Ubuntu Cape Town Academy nungi asaya tenzüka liasü, ta local media sangdong balala ajanga metetdaksü.

Premier Soccer League-i ashiba agi, hopta tatemi top-flight aser second-tier asaya ajak masaya tsüingda Fleurs nem aküm tetushi agütsüba mapang agitsü.

PV Sindhu-i Uber Cup nung shilem magitsü telemtetba agiogo

Rongchii/April 4, 2024 (Agencies): Olympic nung medal ana tashi ngur alila PV Sindhu aser tetsür tarep asayar tarep anati Uber Cup nung shilem magitsü telemtetba agiogo, ajisüaka Thomas Cup title defend asütsü atema tebu team bo kanga tashi ita lir. Iba asayamung nung April 27 nü Chengdu nung tenzüktsü.

Sindhu yirur talangka masayai lir February ita Badminton Asia Team Championships nungi asaya tenzüka liasü, la asayamung trok tashi nung asayaogo aser ibayongji la Paris Olympics atema renema atatsü asoshi iba asayamung nung shilem magitsü telemtetba agiogo.

Tetsür tarep ana; Treesa Jolly-Gayatri Gopichand aser Ashwini Ponnappa o Tanisha Crasto nungeri iba asayamung nung shilem magitsü telemtetba agiogo, kechiyong Sindhu team nung mali asünung team kangabo tashi maittsü. Parnokia Olympics atema qualify asütsü asoshi rengloker asayatsü telemtetba agiogo.

Sindhu aser tarep ana masayatsü atema telemtetba agiba sülen Badminton Association of India (BAI)-i, Senior National Championships nung kanga junga asayaba asayartem nem maongka agütsütsü telemtetba agiogo.

Tebur atema asayamung Thomas Cup nung India team defending champions lir aser asayar shimertemi lanur aser asayar tejentem meyoktepba team tashitait ka shimogo.

India tebur team-i 2022 küm Thailand nung Thomas Cup final asaya nung Indonesia team 3-0 agi koka mezüingbuba Thomas Cup akok aser otsü tasen ka yanglua liasü.

Senior selection committee-isa, taküm asayartem asayamung aika nung shilem agitsü lir asünung kija asaya atema asayar timba shimogo.

Asayar 10 agi kümttba Thomas Cup nung kija asayar pongu lir aser HS Prannoy, Lakshya Sen, Kidambi Srikanth aser Priyanshu Rajawat nunger den Kiran George densemogo aser kasa

mapang nung Sai Pratheek tarep asaya back-up asütsü. Tarep asayartem rongnung World No. 1 tarep Satwiksairaj Rankireddy aser Chirag Shetty na aser MR Arjun o Dhruv Kapila nunger densema lir.

National coach Pulella Gopichand, taoba mapang asayar U Vimal Kumar, Jwala Gutta, Manjusha Kanwar, Partho Ganguly aser Mallika Baruah Sarma nunger densema selection committee online senden ka amenba sülen Thomas Cup team shima liasü.

Thomas Cup squad: (Singles) HS Prannoy, Lakshya Sen, Kidambi Srikanth, Priyanshu Rajawat aser Kiran George; (Doubles) Satwiksairaj Rankireddy, Chirag Shetty, MR Arjun, Dhruv Kapila aser Sai Pratheek

Uber Cup squad: (Singles) Anmol Kharb, Tanvi Sharma, Ashmita Chaliha aser Isharani Baruah; (Doubles) Shruti Mishra, Priya Konjengbam, Simran Singhi aser Ritika Thaker.

BILEMTETER



Asür Tsürabur Repalemba (April 05)

Ozü tsürabur iba lima nungi pilar tanü küm ka ajungba anogo nung na bilemteta onok Chirnur, Semchirtem aser kinungertem sarasadema amonger.

- Temeim Chirnur , Semchir aser Kinungertem .

IPL 2024: Rishabh Pant dang senchi sen lakh 24 achi



Rongchii/April 4, 2024

(Agencies): Bodhbarnü Delhi Capitals' (DC) pur Kolkata Knight Riders (KKR) den asayaba mapang tang asaya aliba asayamung nung tanabenbuba minimum-over-rate dak sendakba nung aibelenba atema DC captain Rishabh Pant dang Indian Premier League-i senchi sen lakh 24 chiogo.

Visakhapatnam nung KKR makokba asaya nung Delhi team-i atakzükja aliba mapang dang nungi mapang talila agiba nguteta liasü

IPL indang Code of Conduct kübok minimum-over-rate dak sendakba nung tanabenbuba aibelenba ajanga captain Pant dang senchi aika chiogo aser Impact Player densema Playing XI nung aliba asayar ajak dang senchi sen lakh 6 mesüra parnok indang match fees shilem 25 chiogo, ta IPL-i sangdong ka ajanga metetdaksü.

Iba asaya nung KKR puri asayar 7 out sür run 272 yanglu, koba IPL puti otsü nung run timtiba yangluba rongnung tanabuba lir.

Run arishiba mapang Delhi Capitals' pur top order temi junga masayateti kanga kara out süadok aser iba ajanga Pant (55) aser Tristan Stubbs (54) na nem teraksa yanglushitsü atema dang masü saka Delhi pur asaya jenjang yanglushitsü atema khuret agüja liasü.

Tenati kanga merangdanga asaya aser tenapronglai half-centuries yanglua run 93 yanglu. Ajisüaka tenati merangdangbaji DC atema teperi masü asü aser parnoki asaya run 106 agi mekoki liasü.

Kasa mapang nung tang point table nung temaba jenjang nung aliba KKR-i maneni kanga junga asaya parnok tang tashi nung asaya ka nung danga tamakok ngua mali. Parnoki tang tashi nung asaya asemprongla koka lir.

INDIA OSANG : Tapak 3 nungi...

Kejriwal Chief Minister menden nungi...

Ken o benoksang atema ken o jembitsüri court dang, March 21 nü Kejriwal apuba sülen linük yimtiba nung sorkar mali ama kümogo, ta shia Kejriwal CM menden nungi agientsü mepishi.

Ajisüaka High Court-i, iba ken o dak sendakba nung Lieutenant Governor mesüra linük Tiri telemtetba agitsü akok, ta metetdakja liasü.

High Court-i, "Sorkar mapa meinyaker, ta komaser onoki

shitettsü? Iba telemtetba agitsü atema LG dak tashi lir. Pai (LG) onok dang nungi shisa menüingdaker. Ozüing kübok kechi tim'ar pai inyaksü," ta metetdaksü.

March 28 nüa Surjit Singh Yadav-i Kejriwal CM menden nungi agientsü temepishiba ken o benoka liasü saka court-i, iba ken o nung court-i tiyongtsü ia inyaksü makok, ta shia temepishiba ken oji magizüki liasü.

BILEMDANGANG

"Pei-i kechi akoker aji meranga inyakang."